

Na osnovu člana 63. stav (1) tačka d) Zakona o visokom obrazovanju („Sl. novine TK“, br. 21/2021- autentično tumačenje 5/2022, 11/2022 i 16/2022) i člana 52. stav (1) tačka b) Statuta Univerziteta u Tuzli, Senat Univerziteta u Tuzli na sjednici održanoj 29.09.2023. godine donio je

PRAVILNIK

o utvrđivanju postupka ekvivalencije izbora nastavnika izabranih na drugim visokoškolskim ustanovama sa izborima na užim naučnim/umjetničkim oblastima/nastavnim predmetima na Univerzitetu u Tuzli

I OPĆE ODREDBE

Član 1.

(Predmet Pravilnika)

Pravilnikom o utvrđivanju postupka ekvivalencije izbora nastavnika izabranih na drugim visokoškolskim ustanovama sa izborima na užim naučnim/umjetničkim oblastima/nastavnim predmetima na Univerzitetu u Tuzli (dalje: Pravilnik) uređuje se način i postupak ekvivalencije izbora nastavnika izabranih na drugoj visokoškolskoj ustanovi radi imenovanja i učešća u radu komisija za pripremanje prijedloga: za izbor u naučno-nastavna /umjetničko-nastavna i saradnička zvanja, komisija u postupcima sticanja naučnog stepena doktora nauka na trećem ciklusu studija, stručnog stepena magistra na drugom ciklusu studija; za imenovanje mentora pri izradi doktorske disertacije/magistarskog rada i za učestvovanje u izvođenju nastave na Univerzitetu u Tuzli (u daljem tekstu: Univerzitet) na svim ciklusima studija.

Član 2.

(Određenje pojma ekvivalencija)

Ekvivalencija je usklađivanje važećeg izbora nastavnika izabranog na drugoj javnoj akreditovanoj visokoškolskoj ustanovi sa izborima nastavnika izabranih na Univerzitetu.

Član 3.

Ekvivalencija u smislu člana 2. ovog Pravilnika ima za cilj i podrazumijeva prepoznavanje značajne podudarnosti izbora nastavnika izabranog na drugoj javnoj akreditovanoj visokoškolskoj ustanovi sa izborom u odgovarajuće naučno-nastavno/umjetničko-nastavno zvanje na Univerzitetu na odgovarajuću užu naučnu/umjetničku oblast/ nastavni predmet ili predmete.

II POSTUPAK EKVIVALENCIJE I NADLEŽNI ORGANI

Član 4.

Prije imenovanja za predsjednika/člana komisije/mentora ili za angažman u realizaciji nastave na Univerzitetu, prodekan za nastavu i studentska pitanja ili drugo lice koje dekan ovlasti, o namjeri za planirani angažman na Univerzitetu, po nekom od osnova iz člana 1. ovog Pravilnika obavještava o tome nastavnika izabranog na drugoj javnoj akreditovanoj visokoškolskoj ustanovi te ga pismenim putem ili drugim vidom elektronske komunikacije poziva da se izjasni o prihvatanju angažmana te da dostavi biografiju s bibliografijom i važeću odluku o izboru na drugoj visokoškolskoj ustanovi radi ekvivalencije izbora.

Član 5.

- (1) Nakon dobijanja saglasnosti nastavnika za angažman, prijedlog odluke o ekvivalenciji izbora radi mentorisanja i/ili članstva u komisiji u postupku sticanja stručnog stepena magistra na drugom ciklusu studija utvrđuje Odbor drugog ciklusa studija i dostavlja ga naučno-nastavnom/umjetničko nastavnom vijeću (dalje: NNV/UNV) fakulteta/Akademije u roku od 7 (sedam) dana.
- (2) Prijedlog odluke iz stava (1) ovog člana treba biti činjenično obrazložen.

Član 6.

- (1) Nakon dobijanja saglasnosti nastavnika za angažman, prijedlog odluke o ekvivalenciji izbora radi mentorisanja i/ili članstva u komisiji u postupku sticanja naučnog stepena doktora nauka na trećem ciklusu studija utvrđuje Vijeće doktorskog studija i dostavlja ga NNV/UNV-u fakulteta/Akademije u roku od 7 (sedam) dana.
- (2) Prijedlog odluke iz stava (1) ovog člana treba biti činjenično obrazložen.

Član 7.

Nakon dobijanja saglasnosti nastavnika za angažman, prijedlog odluke o ekvivalenciji izbora radi izvođenja nastave utvrđuju prodekan za nastavu i studentska pitanja, odnosno prodekan za naučno-istraživački/umjetničko-istraživački rad fakulteta/Akademije i dostavlja ga NNV/UNV-u fakulteta/Akademije u roku od 7 (sedam) dana.

Član 8.

Nakon dobijanja saglasnosti nastavnika za angažman, prijedlog odluke o ekvivalenciji izbora radi članstva u komisijama za izbor u naučno-nastavna/umjetničko-nastavna i saradnička zvanja utvrđuje prodekan za naučno-istraživački/umjetničko-istraživački rad fakulteta/Akademije i dostavlja ga NNV/UNV-u fakulteta/Akademije u roku od 7 (sedam) dana.

Član 9.

- (1) Odluku o ekvivalenciji izbora nastavnika izabranog na drugoj javnoj akreditovanoj visokoškolskoj ustanovi sa izborom na odgovarajućoj užoj naučnoj/umjetničkoj oblasti/nastavnim predmetom ili predmetima na Univerzitetu u Tuzli donosi NNV/UNV fakulteta/Akademije.
- (2) Odluka NNV/UNV fakulteta/ADU je konačna.

Član 10.

Broj i datum odluke NNV/UNV o izvršenoj ekvivalenciji izbora unosi se u odluku /prijedlog odluke o imenovanju nastavnika izabranog na drugoj javnoj akreditovanoj visokoškolskoj ustanovi za predsjednika/člana komisije/mentora u postupcima iz člana 1. ovog Pravilnika, te se dostavlja Senatu Univerziteta uz prijedlog odluke.

III PRELAZNE I ZAVRŠNE ODREDBE

Član 11.

Postupci za izbor u naučno-nastavna/umjetničko-nastavna zvanja, kao i postupci za sticanje naučnog/stručnog stepena magistra, odnosno doktora nauka u smislu člana 1. ovog Pravilnika započeti prije njegovog donošenja okončat će se u postupku i po pravilima koja su u primjeni prije stupanja na snagu ovog Pravilnika.

Član 12.

Ovaj Pravilnik stupa na snagu danom donošenja.

UNIVERZITET U TUZLI

Broj: 03-5206-1-14/23

Tuzla, 29.09.2023. godine



PREDSJEDAVAJUĆA SENATA

Nermina Hadžigrahić
Dr. sci. Nermina Hadžigrahić, red.prof.